

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱԶԳԱՅԻՆ ԺՈՂՈՎԻ ՆԱԽԱԳԱՀԻ
ՏԵՂԱԿԱԼ
պարոն ՍԱՄՎԵԼ ՆԻԿՈՅԱՆԻՆ

Հարգելի պարոն Նիկոյան

Հայաստանի Հանրապետության կառավարությունը Հայաստանի Հանրապետության Ազգային ժողովի պատգամավոր Վիկտոր Դալլաքյանի՝ օրենսդրական նախաձեռնության կարգով ներկայացրած «Հայաստանի Հանրապետության քրեական օրենսգրքում փոփոխություններ և լրացումներ կատարելու մասին» Հայաստանի Հանրապետության օրենքի նախագծի վերաբերյալ սկզբունքային առարկություններ չունի: Միաժամանակ հարկ է նկատել, որ՝

1. Համաձայն մի շարք բացատրական և հոմանիշների բառարանների՝ օրենքի նախագծում օգտագործվող «ստերջացում» բառը մարդկանց համար կիրառվող «ամլացում» բառի՝ կենդանիների նկատմամբ օգտագործվող հոմանիշն է:

Միաժամանակ անհրաժեշտ է նկատի ունենալ այն, որ օրենքի նախագծում նկարագրվող գործողության բնորոշման համար օգտագործվում է միջազգային ճանաչում ստացած «chemical castration» հասկացությունը (Մեծ Բրիտանիայում՝ «chemical castration», Ֆրանսիայի

Հանրապետությունում «castration chimique»), ուստի, անհրաժեշտ է քննարկել օրենքի նախագծում օգտագործվող եզրույթի վերանայման հարցը:

2. Օրենքի նախագծի ընդունման կապակցությամբ կարող են էական հակասություններ առաջանալ Հայաստանի Հանրապետության քրեական դատավարության օրենսգրքի դրույթների հետ: Այսպես, Հայաստանի Հանրապետության քրեական դատավարության օրենսգրքի «Անմեղսունակ անձանց նկատմամբ բժշկական բնույթի հարկադրական միջոցներ կիրառելու վարույթը» 52-րդ գլխի համաձայն բժշկական բնույթի հարկադրանքի միջոցները կիրառվում են քրեական օրենքով չթույլատրված արարքը կատարած անձանց նկատմամբ՝ դատարանի որոշմամբ՝ հարկադիր կարգով: Նույն գլխի 450-րդ հոդվածի 1-ին մասի համաձայն «Բժշկական բնույթի հարկադրական միջոցները դատարանը կիրառում է այն անձանց նկատմամբ, ովքեր քրեական օրենքով չթույլատրված արարքը կատարել են անմեղսունակ վիճակում, եթե այդ անձինք շարունակում են վտանգավոր լինել հասարակության համար»: Բացի դրանից, օրենքի նախագծի 1-ին հոդվածով օրենսգրքի 97-րդ հոդվածում որպես լրացում նախատեսվող 5-րդ կետում նշված արարքները հնարավոր է, որ իրականացվեն ոչ միայն անմեղսունակ, այլև մեղսունակ անձանց կողմից:

Հարկ է նկատի ունենալ նաև այն, որ օրենքի նախագծի 1-ին հոդվածով Հայաստանի Հանրապետության քրեական օրենսգրքի 97-րդ հոդվածի 1-ին մասում որպես լրացում նախատեսված 5-րդ ենթակետը խմբագրման կարիք ունի՝ հաշվի առնելով այն հանգամանքը, որ սովյալ ենթակետով հղում է կատարվում օրենսգրքի 140-րդ հոդվածի 3-րդ, 141-րդ հոդվածի 3-րդ և 142-րդ հոդվածի 3-րդ մասերին, որոնք գոյություն չունեն:

3. Նախագծի 1-ին հոդվածով կատարված լրացման դեպքում անհրաժեշտ է օրենսգրքի 97-րդ հոդվածի 2-րդ մասը «առաջին մասում» բառերից հետո լրացնել «բացառությամբ 1-ին մասի 5-րդ կետում» բառերով:

4. 97-րդ հոդվածի 4-րդ մասը «լուծելու համար» բառերից հետո անհրաժեշտ է լրացնել «բացառությամբ սույն հոդվածի 1-ին մասի 5-րդ կետում նշված անձանց» բառերով:

5. Նախագծի 2-րդ հոդվածով օրենսգրքի 97-րդ հոդվածում որպես լրացում նախատեսվող 5-րդ մասի համաձայն նշված բժշկական բնույթի հարկադրանքի միջոցը կիրառվում է համալիր փորձագիտական եզրակացությունից հետո, սակայն պարզ չէ, թե ինչ կարգով, ում կողմից և ինչ ժամկետներում է իրականացվելու տվյալ փորձաքննությունը:

6. Նախագծի 4-րդ հոդվածով օրենսգրքում որպես լրացում նախատեսվող 100.1-ին հոդվածի՝

1) 1-ին մասում «դեղամիջոց» բառը փոխարինել «դեղ» բառով՝ նկատի ունենալով «Դեղերի մասին» Հայաստանի Հանրապետության օրենքի 1-ին հոդվածի պահանջը.

2) վերաբերյալ տեղեկացնում ենք, որ դրա ընդունման կապակցությամբ կարող են առաջանալ իմաստային և իրավական հակասություններ՝ Հայաստանի Հանրապետության քրեական օրենսգրքի և քրեական դատավարության օրենսգրքի դրույթների հետ:

Մասնավորապես, նախագծի 4-րդ հոդվածով օրենսգրքում որպես լրացում նախատեսվող 100.1-ին հոդվածի 3-րդ մասի համաձայն առաջին անգամ հանցանք կատարած անձի նկատմամբ քիմիական ստերջացումը նախատեսվում է իրականացնել վերջինիս համաձայնությամբ: Այնինչ, Հայաստանի Հանրապետության քրեական օրենսգրքի «Բժշկական բնույթի հարկադրանքի միջոցները» 15-րդ գլխի և Հայաստանի Հանրապետության քրեական դատավարության օրենսգրքի «Անմեղսունակ անձանց նկատմամբ բժշկական բնույթի հարկադրական միջոցներ կիրառելու վարույթը» 52-րդ գլխի իմաստային բովանդակությունից բխում է, որ բժշկական բնույթի հարկադրանքի միջոցները կիրառվում են քրեական օրենսգրքով չթույլատրված արարքը կատարած անձանց նկատմամբ՝ դատարանի որոշմամբ՝ հարկադիր կարգով:

Միջազգային փորձի տեսակետից հայտնում ենք, որ քիմիական կաստրացիան կիրառվում է ԱՄՆ-ում Կալիֆոռնիա, Ֆլորիդա, Ջորջիա, Տեխաս, Լուիզիանա, Մոնտանա նահանգներում, Կանադայում և մի շարք եվրոպական պետություններում Մեծ Բրիտանիա, Ֆրանսիա, Գերմանիա, Դանիա, Իսրայել, Շվեդիա, Լեհաստան, Նորվեգիա:

Միջազգային փորձի ուսումնասիրությունից բխում է, որ տարբերակվում է երկու ձևի քիմիական կաստրացիա՝ պարտադիր՝ անկախ հանցագործի ցանկությունից կամ համաձայնությունից (սման կարգավորում է նախատեսված ԱՄՆ-ի նշված նահանգներում և Լեհաստանում) և կամավոր՝ միայն հանցագործի համաձայնությամբ կիրառվող (սման կարգավորում է նախատեսված մի շարք եվրոպական պետություններում Մեծ Բրիտանիա, Ֆրանսիա, Գերմանիա, Դանիա, Իսրայել, Շվեդիա, Լեհաստան, Նորվեգիա):

Միջազգային փորձի ուսումնասիրությունից բխում է նաև, որ քիմիական կաստրացիան կիրառվում է հետևյալ ընթացակարգով՝

սեռական անձեռնմխելիության համար դատապարտված հանցագործները պատիժը կրելու ավարտից առաջ՝ հիմնականում մեկ շաբաթ առաջ, պարտադիր կերպով անցնում են բժշկական-հոգեբանական-հոգեբուժական փորձաքննություն: Փորձաքննության արդյունքում, եթե հաստատվում է ապագայում այդ հանցագործության կատարման հնարավորությունը, այդ անձանց առաջարկվում է կիրառել քիմիական կաստրացիա: Հրաժարվելու դեպքում նրանց նկատմամբ նշանակվում է հիվանդանոցային հարկադիր բուժում՝ նրանց հասարակությունից մեկուսացնելու միջոցով: Դա կիրառվում է այնքան ժամանակ, մինչև այդ անձինք համաձայնվում են քիմիական կաստրացիայի, կամ դատարանը՝ համապատասխան բժշկական-հոգեբանական-հոգեբուժական փորձաքննության հիման վրա հաստատված է համարում նրանց հանրային վտանգավորության բացակայությունը:

Մեծ Բրիտանիայում նույնպես ներդրվել է քիմիական կաստրացիա՝ անձի համաձայնությամբ: Բացի դրանից՝ ընդունվել է Մեզանի օրենքին համահունչ օրենք, որի համաձայն նախկինում սեռական հանցագործություն կատարած անձանց ցուցակները հրապարակվում են:

Չեխիան աշխարհի գրեթե միակ երկիրն է, որտեղ կիրառվում է ֆիզիկական կաստրացիա: Այն կիրառվում է հիմնականում կրկնահանցագործների նկատմամբ և միայն կամավոր հիմունքներով:

Լեհաստանը միակ եվրոպական երկիրն է, որտեղ քիմիական կաստրացիան կիրառվում է անկախ անձի համաձայնությունից: Դա պարտադիր կերպով կիրառվում է այն անձանց նկատմամբ, ովքեր բռնաբարել են մինչև 15 տարեկան անձանց կամ մերձավոր ազգականի: Այլ սեռական բնույթի հանցագործությունների կատարման համար դրա կիրառման հնարավորությունը որոշում է դատարանը, որն այդ որոշումը կայացնում է անձին ազատ արձակելուց 6 ամիս առաջ:

Հարավային Կորեան դարձել է առաջին ասիական երկիրը, որտեղ քիմիական կաստրացիան նախատեսված է որպես քրեական պատիժ: Օրենքը հնարավորություն է տալիս դատարաններին որպես պատիժ նշանակել քիմիական կաստրացիան մինչև 15 տարի ժամկետով՝ անչափահասների նկատմամբ սեռական հանցագործություն կատարած անձանց նկատմամբ:

Վերլուծելով նշված փորձը՝ գտնում ենք, որ Հայաստանի Հանրապետությունում նպատակահարմար է քիմիական կաստրացիան դիտարկել ոչ թե որպես պատիժ, այլ որպես հանցագործությունների կանխման միջոց:

Միաժամանակ հայտնում ենք, որ, ներկայացված օրենքի նախագիծը Հայաստանի Հանրապետության Ազգային ժողովում քննարկելիս, հարակից զեկուցմամբ հանդես կգա Հայաստանի Հանրապետության արդարադատության նախարար Հրայր Թովմասյանը:

Ներկայացնում ենք օրենքի նախագծի ընդունման դեպքում ընդունումից հետո դրա կատարումն ապահովող՝ Հայաստանի Հանրապետության կառավարության որոշումների կամ այլ իրավական ակտերի ցանկը և ժամանակացույցը՝

1. «Քիմիական եղանակով ստերջացում իրականացնելու համար անհրաժեշտ հորմոնալ դեղամիջոցների ցանկը հաստատելու մասին» Հայաստանի Հանրապետության կառավարության որոշում՝ օրենքի ընդունումից 6 ամիս հետո:

2. «Քիմիական ստերջացում իրականացնելու համար անհրաժեշտ համալիր փորձաքննության իրականացման կարգը հաստատելու մասին» Հայաստանի Հանրապետության կառավարության որոշում՝ օրենքի ընդունումից 6 ամիս հետո:

Կից ներկայացվող փաստաթղթերում տրված է օրենքի նախագծի կարգավորման ազդեցության գնահատականը:

Հարգանքով՝

ՏԻԳՐԱՆ ՍԱՐԳՍՅԱՆ

**ՀԱԿԱԿՈՌՈՒՊՑԻՈՆ ԲՆԱԳԱՎԱՌՈՒՄ ԿԱՐԳԱՎՈՐՄԱՆ ԱԶԳԵՑՈՒԹՅԱՆ
ԳՆԱՀԱՏՄԱՆ ԵԶՐԱԿԱՑՈՒԹՅՈՒՆ**
**«Հայաստանի Հանրապետության քրեական օրենսգրքում փոփոխություններ և
լրացումներ կատարելու մասին» Հայաստանի Հանրապետության օրենքի
նախագծի վերաբերյալ**

«Հայաստանի Հանրապետության քրեական օրենսգրքում փոփոխություններ և
լրացումներ կատարելու մասին» Հայաստանի Հանրապետության օրենքի նախագիծն իր
մեջ Հայաստանի Հանրապետության կառավարության 2009 թվականի հոկտեմբերի 22-ի
«Նորմատիվ իրավական ակտերի նախագծերի հակակոռուպցիոն քննազննում
կարգավորման ազդեցության գնահատման իրականացման կարգը հաստատելու
մասին» թիվ 1205-Ն որոշմամբ հաստատված Կարգի 9-րդ կետով նախատեսված որևէ
կոռուպցիոն գործոն չի պարունակում:

Եզրակացություն

«Հայաստանի Հանրապետության քրեական օրենսգրքում փոփոխություններ և լրացումներ կատարելու մասին» Հայաստանի Հանրապետության օրենքի նախագծի (այսուհետ՝ Նախագիծ)՝ սոցիալական պաշտպանության ոլորտում կարգավորման ազդեցության գնահատման վերաբերյալ

Նախագծի՝ սոցիալական պաշտպանության ոլորտում կարգավորման ազդեցության գնահատումն իրականացվել է Հայաստանի Հանրապետության Կառավարության 2010 թվականի հունվարի 14-ի «Նորմատիվ իրավական ակտերի նախագծերի՝ սոցիալական պաշտպանության ոլորտում կարգավորման ազդեցության գնահատման իրականացման կարգը հաստատելու մասին» N 18-Ն որոշման համաձայն:

Նախագիծը սոցիալական պաշտպանության ոլորտում ունի դրական ազդեցություն:

ԱԶԴԵՑՈՒԹՅԱՆ ԳՆԱՀԱՏՄԱՆ ՄԱՍԻՆ ԵԶՐԱԿԱՑՈՒԹՅՈՒՆ

«Հայաստանի Հանրապետության քրեական օրենսգրքում փոփոխություններ և լրացումներ կատարելու մասին» Հայաստանի Հանրապետության օրենքի նախագծի բնապահպանության բնագավառում կարգավորման

1. «Հայաստանի Հանրապետության քրեական օրենսգրքում փոփոխություններ և լրացումներ կատարելու մասին» Հայաստանի Հանրապետության օրենքի (այսուհետ՝ օրենք) նախագծի ընդունման արդյունքում շրջակա միջավայրի օբյեկտների՝ մթնոլորտի, հողի, ջրային ռեսուրսների, ընդերքի, բուսական և կենդանական աշխարհի, հատուկ պահպանվող տարածքների վրա բացասական հետևանքներ չեն առաջանա:

2. Օրենքի նախագծի չընդունման դեպքում շրջակա միջավայրի օբյեկտների վրա բացասական հետևանքներ չի առաջացնի:

3. Օրենքի նախագիծը բնապահպանության ոլորտին չի առնչվում, այդ ոլորտը կանոնակարգող իրավական ակտերով ամրագրված սկզբունքներին և պահանջներին չի հակասում:

Օրենքի նախագծի կիրարկման արդյունքում բնապահպանության բնագավառում կանխատեսվող հետևանքների գնահատման և վարվող քաղաքականության համեմատական վիճակագրական վերլուծություններ կատարելու անհրաժեշտությունը բացակայում է:

**ԱՌՈՂՋԱՊԱՀՈՒԹՅԱՆ ԲՆԱԳԱՎԱՌՈՒՄ ԿԱՐԳԱՎՈՐՄԱՆ ԱԶԴԵՑՈՒԹՅԱՆ
ԳՆԱՀԱՏՄԱՆ ԵԶՐԱԿԱՑՈՒԹՅՈՒՆ**

**«Հայաստանի Հանրապետության քրեական օրենսգրքում փոփոխություններ և
լրացումներ կատարելու մասին»**

Հայաստանի Հանրապետության օրենքի ընդունման դեպքում

«Հայաստանի Հանրապետության քրեական օրենսգրքում փոփոխություններ և
լրացումներ կատարելու մասին» Հայաստանի Հանրապետության օրենքի ընդունումը
ատողջապահության բնագավառի վրա ազդեցություն չի ունենա:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԸ

Հայաստանի Հանրապետության քրեական օրենսգրքում փոփոխություններ եւ լրացումներ կատարելու մասին

ՀՈԴՎԱԾ 1. Հայաստանի Հանրապետության 2003 թվականի ապրիլի 18-ի քրեական օրենսգրքի (այսուհետ՝ Օրենսգիրք) 97-րդ հոդվածի 1-ին մասը ավելացնել հետևյալ բովանդակությամբ 5-րդ կետով՝

«5) ով կատարել է սույն օրենսգրքի 138-րդ հոդվածի 3 մասով, 139-րդ հոդվածի 3-րդ մասով, 140-րդ հոդվածի 3-րդ մասով, 141-րդ հոդվածի 3-րդ մասով եւ 142-րդ հոդվածի 3-րդ մասով նախատեսված հանցանքներ:»

ՀՈԴՎԱԾ 2. Օրենսգրքի 97-րդ հոդվածը լրացնել հետևյալ բովանդակությամբ 5-րդ մասով՝

«5. Սույն հոդվածի 1-ին մասի 5-րդ կետով նախատեսված անձանց նկատմամբ բժշկական բնույթի հարկադրանքի միջոցը կիրառվում է համալիր փորձագիտական եզրակացությունից հետո այն մասին, որ կիրառվող միջոցը չի հանգեցնի ֆիզիկական առողջության վնասման, ինչպես նաեւ անվերահսկելի ազդեսիայի կամ հոգեկան խանգարման առաջացմանը:»

ՀՈԴՎԱԾ 3. Օրենսգրքի 98-րդ հոդվածի 1-ին մասը լրացնել հետևյալ բովանդակությամբ 4-րդ կետով՝

«4. քիմիական եղանակով ստերջացումը:»

ՀՈԴՎԱԾ 4. Օրենսգիրքը լրացնել հետևյալ բովանդակությամբ նոր 100.1-րդ հոդվածով՝

«Հոդված 100.1. Քիմիական եղանակով ստերջացում

1. Քիմիական եղանակով ստերջացումն իրականացնում է մարդու օրգանիզմ ներարկելով հորմոնալ դեղամիջոցներ, որոնց ցանկը սահմանվում է ՀՀ կառավարության կողմից:

2. Քիմիական եղանակով ստերջացումն իրականացնում է ՀՀ առողջապահության նախարարության կազմում գործող մասնագիտական հաստատություններում:

3. Քիմիական եղանակով ստերջացումն առաջին անգամ սույն օրենսգրքի 97-րդ հոդվածի 1-ին մասի 5-րդ կետով նախատեսված հանցանք կատարած անձի նկատմամբ կիրառվում է նրա համաձայնությամբ:

Քիմիական եղանակով ստերջացման կիրառման դեպքում անձի հետ մասնագիտական աշխատանք են իրականացնում հոգեբանը եւ/կամ հոգեբույժը, որոնց հիմնական նպատակն է այդ անձի մոտ կամավոր ստերջացման անհրաժեշտության գիտակցումն ու քիմիական եղանակով ստերջացման կիրառման համար համաձայնություն տալն է:

Սույն օրենսգրքի 97-րդ հոդվածի 1-ին մասի 5-րդ կետով նախատեսված հանցանք կատարած անձը կարող է հրաժարվել քիմիական եղանակով ստերջացման կիրառումից՝ սահմանափակվելով միայն հոգեբանական միջամտությամբ:

Հոգեբանի եւ/կամ հոգեբույժի մասնագիտական գործունեության իրականացման կարգը սահմանվում է ՀՀ կառավարության կողմից:

4. Եթե սույն հոդվածի 3-րդ մասով նախատեսված ներգործության միջոցի կիրառումից հետո, անձը կատարում է սույն օրենսգրքի 97-րդ հոդվածի 1-ին մասի 5-րդ կետով նախատեսված արարք, նրա քիմիական եղանակով ստերջացումն իրականացվում է հարկադրաբար:

Հարկադրաբար քիմիական եղանակով ստերջացումն առաջին անգամ կիրառվում է պատժի կրումից ազատվելուց վեց ամիս առաջ, իսկ եթե անձը պատժի կրումից ազատվում է մինչև նշանակված պատժի ժամկետի ավարտը, ապա՝ ազատման պահին:

Քիմիական եղանակով ստերջացման նպատակով հաջորդ ներարկումներն իրականացվում են համալիր փորձագիտական եզրակացության հիման վրա, որտեղ նշվում է ներարկումների հաճախականությունը, չափը, հնարավոր հետեւանքները եւ այլ տեղեկություններ, որոնք փորձագետի կարծիքով էական են եւ անհրաժեշտ իմանալու համար:»

ՀՈԴՎԱԾ 5. Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը:

ՀԻՄՆԱՎՈՐՈՒՄ

ՄԱԿ-ի 12-րդ համագումարում, որը անց է կացվել 2010թ.-ի ապրիլի 12-19 Սալվադորում քննարկվել են հանցագործությունների կանխարգելման եւ քրեական արդարադատության հարցերը, որի ընթացքում անդրադարձ է կատարվել նաեւ հանցագործության տուժող կամ վկա երեխաների պաշտպանությանը: Մասնավորապես նշվել է հետեւյալը.

ՅՈՒՆԻՍԵՖ-ի գնահատմամբ ամեն տարի աշխարհում 500 մլն.-ից մինչև 1,5 մլրդ երեխա ենթարկվում են բռնության եւ 275 մլն երեխա աշխարհում դառնում կենցաղային բռնության զոհ: Թեւեւ բռնության որոշ դեպքեր անսպասելի եւ սպոնտան են, այնուամենայնիվ, դրանց մեծ մասը երեխաների նկատմամբ կատարվում է այնպիսի մարդկանց կողմից, ում երեխաները ճանանչում են, ում նրանք վստահում են, ում նրանք պետք է դիմեն պաշտպանության եւ աջակցության համար, մասնավորապես, ծնողների, խորթ ծնողների կամ ծնողների ընկերների, ընտանիքի այլ անդամների, այն անձանց կողմից, ովքեր հոգում են նրանց համար, ընկերների/ ընկերուհիների, դասընկերների ու ուսուցիչների, հոգետր ուսուցիչների ու գործատուների կողմից:

37 երկրներից ստացված տվյալները ցույց են տալիս, որ 2-ից 14 տարեկան երեխաների 86% ենթարկվում են ֆիզիկական բռնության եւ/ կամ հոգեբանական ագրեսիայի: Ֆիզիկական բռնության ենթարկվում են երեխաների 2/3-ը:

Վերջին տարիներին ավելացել է երեխաների դեմ կատարվող հանցագործությունների նկատմամբ ուշադրությունը, այդ թվում, նոր տեսակի հանցագործությունների, ինչպիսիք են մարդկանց թրաֆիքինգը, սեռական շահագործումը ինտերնետում եւ չարաշահումները/ խոշտանգումները համակարգչային տեխնոլոգիաների օգտագործմամբ:

Երեխայի իրավունքների մասին 1989թ.-ի կոնվենցիայի 34-րդ հոդվածի համաձայն մասնակից պետությունները պարտավորվում են երեխային պաշտպանել սեռական շահագործման բոլոր ձեւերից եւ սեռական չարաշահումից: Այդ նպատակով մասնակից պետությունները, մասնավորապես, ներպետական, երկկողմ եւ բազմակողմ մակարդակներով ձեռնարկում են բոլոր անհրաժեշտ միջոցները, որպեսզի կանխարգելեն երեխային ցանկացած ապօրինի սեռական գործունեության դրդելը կամ հարկադրելը:

«Երեխայի իրավունքների մասին» 1996թ.-ի մայիսի 29-ի ՀՀ օրենքի 8-րդ հոդվածի համաձայն յուրաքանչյուր երեխա ունի ֆիզիկական, մտավոր եւ հոգեւոր լիարժեք զարգացման համար անհրաժեշտ կենսապայմանների իրավունք: Երեխայի զարգացման համար անհրաժեշտ կենսապայմանների ապահովման հարցում հիմնական պատասխանատվությունը կրում են ծնողները կամ այլ օրինական ներկայացուցիչները: Ծնողների կամ այլ օրինական ներկայացուցիչների կողմից երեխայի համար անհրաժեշտ կենսապայմանների ապահովման անկարողության կամ անհնարինության դեպքում պետությունը ցուցաբերում է համապատասխան

օգնություն: Նույն օրենքի 9-րդ հոդվածի համաձայն, պետությունն ու նրա համապատասխան մարմիններն իրականացնում են երեխայի պաշտպանությունը ցանկացած բռնությունից, շահագործումից, հանցավոր գործունեության մեջ ներգրավելուց, այդ թվում՝ թմրանյութերի օգտագործումից, դրանց արտադրության կամ առևտրի մեջ ներգրավումից, մուրացկանությունից, անառակությունից, մոլի խաղերից եւ նրա իրավունքների եւ օրինական շահերի այլ ոտնահարումից:

Այս եւ այլ դրույթներ, որոնք ամրագրված են եւ միջազգային, եւ ազգային օրենսդրության մեջ ստեղծում են այն իրավական բազան, որի համաձայն ցանկացած երեխա պետք է գտնվի մշտական պաշտպանության տակ, եւ այդ պաշտպանությունը պետք է տրամադրվի պետության կողմից՝ հնարավոր բոլոր միջոցների կիրառմամբ:

Սեռական շահագործումից եւ սեռական բնույթի բռնություններից երեխաների պաշտպանությանը վերաբերող հիմնական միջազգային իրավական ակտ է համարվում Սեռական շահագործումից եւ սեռական բնույթի բռնություններից երեխաների պաշտպանության մասին Եվրոպայի խորհրդի 2007թ.-ի կոնվենցիան, որի 7-րդ հոդվածի համաձայն, որը վերնագրված է «Կանխարգելիչ միջամտության ծրագրերը կամ միջոցառումները», յուրաքանչյուր կողմ ապահովում է, որ այն անձինք, ովքեր մտավախություն ունեն, որ կարող են կատարել սույն Կոնվենցիայով նախատեսված հանցագործություններից որեւէ մեկը, անհրաժեշտության դեպքում, կարողանան մասնակցել միջամտության ծրագրերին կամ միջոցառումներին, որոնք նախատեսված են գնահատելու եւ կանխարգելելու կատարվող հանցագործությունների ռիսկը: Այստեղ խոսքը գնում է նաեւ քիմիական եղանակով ստերոիդային եւ միջամտության այլ եղանակների մասին:

Այդ միտքը մանրամասնվում է կոնվենցիայի այլ հոդվածներում: Այսպես, 15-րդ հոդվածի համաձայն՝ յուրաքանչյուր Կողմ, իր ներպետական իրավունքի համաձայն, ապահովում կամ խթանում է 16-րդ հոդվածի 1-ին եւ 2-րդ պարբերություններում նշված անձանց (կասկածյալների եւ դատապարտյալների) համար արդյունավետ միջամտության ծրագրերը կամ միջոցառումները՝ երեխաների դեմ սեռական բնույթի հանցագործությունների կրկնման ռիսկերը կանխարգելելու կամ նվազագույնի հասցնելու նպատակով: Նման ծրագրերը կամ միջոցառումները պետք է հասանելի լինեն վարույթի ընթացքում ցանկացած պահի, բանտից դուրս եւ ներս՝ ներպետական իրավունքով սահմանված պայմանների համաձայն:

Քանի որ մանկապիղծների կատարած սեռական հանցագործությունների քանակը տարեց տարի ավելանում է ամբողջ աշխարհում եւ հաշվի առնելով միջազգային օրենսդրությունը, շատ եվրոպական երկրներում, ԱՄՆ-ի մի շարք նահանգներում ներդրվել է քիմիական կրտման կամ քիմիական եղանակով ստերոիդային ինստիտուտը, որի էությունը կայանում է նրանում, որ տղամարդու օրգանիզմը ներարկում են հատուկ դեղամիջոց (օրինակ, թեստոսթերոն հորմոնի ձեւափոխված տարբերակը՝ testosterone undecanoate), որն ընկճում է տղամարդու սեռական ցանկությանները:

Այժմ Ամերիկայում գործում է «Պարտադիր կրտման մասին» օրենքը, որն ուժի մեջ է մտել 1990 թ.-ին: Ընդ որում, Կալիֆորնիա նահանգում քիմիական կրտումը պարտադիր է բոլոր մանկապիղծների համար:

Գերմանիայում, Դանիայում, Կանադայում եւ Շվեդիայում քիմիական կրտումը կիրառվում է դատապարտյալի համաձայնությամբ: 2007թ.-ից, քիմիական կրտումը կամավոր հիմունքներով իրականացվում է նաեւ Մեծ Բրիտանիայում այն մանկապիղծների նկատմամբ, որոնք կրել են իրենց պատիժը եւ նախապատրաստվում են ազատվեն պատժից:

2004թ.-ից Իսրայելում քիմիական կրտման նպատակով փորձարկվել է «Դեկապետոլ» դեղամիջոցը: Այդ փորձնական ծրագիրն իրականացվում էր Իսրայելի առողջապահության նախարարության ու բանտային վարչության կողմից այն դատապարտյալ մանկապիղծների նկատմամբ, որոնք պատիժ էին կրում բանտերում:

Գերմանիայում, որտեղ կամավոր կրտման են ենթարկվում տարեկան մինչև 6 հանցագործ, վիճակագրությունը ցույց է տալիս, որ առանց կրտման/ ստերջացման պատժից ազատված մանկապիղծների կողմից կրկնակի հանցագործություն կատարելու հնարավորությունը կազմում է 84 տոկոս, իսկ կրտումից/ ստերջացումից հետո՝ ընդամենը 3 տոկոս:

Լեհաստանում 2009թ.-ին ընդունվել է մի օրենք, որի համաձայն մանկապիղծի բուժման անհրաժեշտությունը որոշում է դատարանը ոչ ուշ, քան պատիժը կրելն ավարտելուց 6 ամիս առաջ, եւ միայն այն դեպքում, երբ տուժողը եղել 15 տարեկան չլրացած անձ կամ հանցագործն ու տուժողը ազգականներ են:

Ներկայացվող նախագծով առաջարկվում է ընդլայնել բժշկական բնույթի հարկադրանքի միջոցների կիրառման հիմքերի ցանկը՝ կիրառելով այն նաեւ ՀՀ քր. օր.-ի 138-րդ հոդվածի 3 մասով, 139-րդ հոդվածի 3-րդ մասով, 140-րդ հոդվածի 3-րդ մասով, 141-րդ հոդվածի 3-րդ մասով եւ 142-րդ հոդվածի 3-րդ մասով նախատեսված հանցանքներ կատարած անձանց նկատմամբ:

Այս միջոցները կիրառվելու են մանկապիղծների նկատմամբ համալիր փորձագիտական եզրակացությունը ստանալուց հետո, որով կհիմնավորվի այդ միջոցի անվտանգությունը ֆիզիկական առողջության համար եւ եթե այն չի հանգեցնի անվերահսկելի ագրեսիայի կամ հոգեկան խանգարման առաջացմանը:

Քիմիական եղանակով ստերջացման առաջին ներարկումը կիրականացվի առողջապահության մարմիններում՝ բժիշկների հսկողության տակ, որոնք հսկողություն կիրականացնեն վերահսկողություն անձի վարքագծի նկատմամբ նաեւ հետներարկման ժամանակահատվածում:

Մենք գտնում ենք, որ օրենսդրական այս նախաձեռնությունը զգալիորեն կազդի անչափահասների սեռական ազատության եւ սեռական անձեռնմխելիության դեմ ուղղված հանցագործությունների վիճակագրության վրա: Մասնավորապես, որ ՀՀ-ում սեռական հանցագործությունների վիճակագրությունը հետեւյալն է՝ ՀՀ գլխավոր դատախազության տվյալների համաձայն 2008թ.-ին կատարվել է սեռական ազատության եւ սեռական անձեռնմխելիության դեմ ուղղված 63 հանցագործություն, 2009թ.-ին՝ 73, իսկ 2010թ.-ի միայն առաջին կիսամյակում՝ 54 հանցագործություն, որոնցից գերակա մասը կատարվել են անչափահասների նկատմամբ՝ այն էլ ՀՀ քր. օր.-ի 141-րդ հոդվածով:

Օրինագծի մշակմանը մասնակցել է ՀՀ Դատախազության դպրոցի դասախոս, ՀՀ ոստիկանության ակադեմիայի դասախոս, ԵՊՀ քրեական իրավունքի ամբիոնի հայցորդ Դավիթ Թումայանը: